


# Lapen é Bèf a Konpè Louwa



- Tim tim ?
- Bwa sèk !
- Ho ! ho ! Ba ! ba ! Pikan pikan ! Nyen Nyen ?
- Chatengn !

**K**onpè Louwa té tini on bèl bèf ; bèf-la té tèlman bèl kè tout moun té vlé manjé'y.

Men Louwa té ni osi on pyès ki té mérité bitwé (dé èkta tè avè yenki ti zouti adan). Konpè Louwa pa té ka touvé pon sé bèt-la pou travay an pyès zouti-la. Louwa fè pasé on mo :

«Pou on bèt pé manjé gwo bèf a'y la, fò bèt-la sa bitwé pyès zouti-la jous-tan i fini san janmen graté'y».

Fo kwè bèf-la té bèl menm !

Lè lendi maten opipirit chantan désan bèt réponn pwézan a lapèl. Yo ataké.

On pati ka koupé ti zouti, onnòt pati ka sèklé, dèt ka mèt déwò.

O pwemyé vwayaj, sé la ki té ka mèt zèb déwò la éliminé, an penn yo té fouté zèb-la atè, yo koumansé graté.

Apwé, sété sé bèt-la ki té ka koupé zouti-la ki graté yo. Anfen ofi a mizi, sé bèt-la ka touvé yo, pé pa tchenbé

ankò é yo graté yo. Sa ki fè, onlè, rété yenki Lapen é Zanba.

Yo mété yo tchenbé kè.

Zanba menm, lontan i pé pa tchenbé ankò, men i tèlman lèdmannye kè i ka tchenbé kan menm. I sipòté, i soufè, i pléré.

A lafen i pa té pé ankò, i graté kò a'y. Yo mété'y déwò.

Ka rété yenki Lapen. Men Lapen poko gannyé poussa. Lapen sav tout lézòt bèt-la ka gadé'y. I tchenn. I tchenn.

On lè, té ka rété on sèl tipil zouti a sèklé, Lapen santi fò'y graté'y kout kè kout si'y vé pa vin fou.

I kriyé tiboug a Louwa, ki té rété pou vwè ki moun ki ka gannyé.

I di ti boug-la :

- Bèf a papa'w-la gra menm ?

- Wè !

- Tout anba vant a'y la konsa gra ? (men pannan i mannyé anba vant a'y pou montré tiboug-la, sé byen graté i ka graté'y).

- Dèyè kou a'y la konsa gra osi ?

- Tout do a'y gra ?

- Anba bwa a'y gra ?...»

Anfen, i montré tiboug-la tout kò a'y, an menm ditan i pwofité pou graté kò

a'y. I di tiboug-la :

- «Mési ! sa'w di mwen la ka ban kè toubonnman, é i fin sèklé zouti-la,

- «Mési ! sa'w di mwen la ka ban kè toubonnman, é i fin sèklé zouti-la, mété'y déwè, brilé tout.

I ann alé, i démaré bèf a'y.

Tout sé bèt-la ka suiv li pou yo vwè si'y ka ba yo mòso.

Zanba ka flaté.

Makak ka fè jès ba'y.

Chyen ka japé pou fè bèf-la maché.

Jako ka bay blag.

Anfen yo akonpannyé'y jous a kaz a'y.

On sèl ki trapé on biten sé chyen pas chyen enmé zo.

**Bout**

(Extrait recueil : «Kont Gwadeloupéyen Sèksyon SJEG Primè Sentwòz»)

